

એફેસી મંડળીલ પાઉલ પ્રેષિતનો લોખલાં પત્ર પ્રસ્તાવના

પ્રેષિત પાઉલાય એફેસીસના આહીપાહીને મંડળીહેન એફેસીનો પત્ર લોખલાં આતા (પ્રેષિત 19) જેથી પોરમેહેરા અનંત યોજના બોદા માઅહાહાટી જેહેકેન યહૂદી એને ગેર યહૂદીહાટી જાહેર કોઅય હોકે. ઈ પોરમેહેરા રહસ્ય હેય, જી યુગાથી દોબલા હેય બાકી આમી યાલ ઈસુ ખ્રિસ્તા નાવાથી જાંઅલા જાહાય, પેલ્લા ત્રીન અધ્યાયાહામાય યે વાતવોય દિયાન ખેયહે કા ખ્રિસ્તા લોકહાન કાય બોરહો કોઅરા જોજે, જી કા ખ્રિસ્તામાય પોરમેહેરા સદા મોયા મહિમામય મિલકાતેલ જાહેર કોઅહે. મોઅલે પાપી પાછે જીવતે ઓઅય જાતહેં એને “સદા મોયાથી બોરહા માધ્યમાકોય” સદા હાટી તારણ મેળાવતેહે 2:8 છેલ્લા ત્રીન અધ્યાય મંડળીહાટી, માઅહાહાટી, એને પરિવારહાહાટી, સદા મોયાલ સામીલ કોઅના વ્યાખ્યા કોઅહે. ઉચે બિજો ભાગ સૈતાના વિરુદ્ધ પોરમેહેરા આથ્યારાહાતે ઉબા રોઅના બારામાય આખહે. પાઉલે ઈ પત્ર જેલેમાય રોઅન લોખ્યાહાં. સંભવત: રોમમાઅને લગભગ ઇસવી સન 60 માય.

સલામ

1 આંય પાઉલ, પોરમેહેરા ઇચ્છાકોય ઈસુ ખ્રિસ્તા પ્રેષિત હેતાંવ. એફેસુસ શેહેરામાય રોનારા પવિત્ર એને ઈસુ ખ્રિસ્તાવોય બોરહો કોઅનારા લોકહાન ઈ પત્ર લોખતાહાવ.

2 આંય પ્રાર્થના કોઅતાહાંવ કા આપહે પોરમેહેર આબો એને પ્રભુ ઈસુ ખ્રિસ્ત તુમહાવોય સદા મોયા કોઅે એને તુમહાન શાંતી દેય.

ખ્રિસ્તમાય છુટકારો

3 ધન્ય હેય પોરમેહેર, આમહે પ્રભુ ઈસુ ખ્રિસ્તા આબો, કાહાકા આય આપહાન હોરગામાઅને દરેક જાત્યા આત્મિક વરદાન દેનલા હેય.

4 પોરમેહેરાય આપહાન ઈ દુનિયા બોનાવા પેલ્લાજ ખ્રિસ્તામાય નિવડી લેદા, જેથી આપા આ હામ્મે પવિત્ર એને દોષવોગાર રોય હોકજે.

5 પોરમેહેર આપહેવોય પ્રેમ કોઅહે, યાહાટી ચ્યાય બોજ પેલ્લાથીજ ઓ નિર્ણય કોઅયો કા, તો ઈસુ ખ્રિસ્તાકોય ચ્યા પોહહા રુપામાય ગોદ લી, પોરમેહેરાય એહેકેન ચ્યા હારી ઇચ્છાકોય એને આનંદકોય કોઅલા હેય.

6 જેથી ચ્યા મહિમામય સદા મોયા સ્તુતિ ઓઅય હોકે, તી સદા મોયા આપહાન ચ્યા પોહો ઈસુ ખ્રિસ્તાકોય મોફાતમાય મિળલી હેય.

7 ઈસુ ખ્રિસ્તા લોય વોવાડલાં કોય આપહાન તારણ એટલે પાપહા માફી મિળી ગીયી, ઈ પોરમેહેરા બોજ સદા મોયા લીદે એહેકેન જાયલા હેય.

8 પોરમેહેરાપાય બોજ જ્ઞાન એને હોમાજ હેય, ચ્યાય બોદા જ્ઞાન એને હોમાજ કોય આપહાવોય સદા મોયા કોઅયી.

9 પોરમેહેરાય પોતાની ઇચ્છાયે ભેદ આમહાવોય પોતાના ભલા ઉદેશ્યા નુસાર પ્રગટ કોઅયા, જી ચ્યાય ખ્રિસ્તામાય પેલ્લેથીજ નોકકી કોઅલા આતાં.

10 જોવે પોરમેહેરા ઈ ગુપ્ત યોજના પુરો ઓઅના સમય યેય જાય, તોવે પોરમેહેર હોરગા એને દોરતી બોદી વસ્તુ ઈસુ ખ્રિસ્તા તાબામાંય કોઅય દી, જેથી ખ્રિસ્ત બોદી વસ્તુહુ માલિક રોય.

11 કાહાકા આપા ઈસુ ખ્રિસ્તાઆરે એકતામાય હેય, આપહાન પોરમેહેરા પાયને વારસો મિળી, કાહાકા પોરમેહેરાય આપહાન પેલ્લાજ નિવાડલા આતા, એને પોરમેહેર ચ્યા યોજના ઇસાબે બોદા કામ કોઅહે.

12 આમા, યહૂદી પેલ્લા લોક હેજે જ્યાહાય ઈસુ ખ્રિસ્તાવોય આશા કોઅયી, એને આમહાન યાહાટી નિવડી લેદા કા આમા પોરમેહેરા મહાનતા હાટી સ્તુતિ કોઅજે.

13 તુમહે આરેબી એહેકેનુજ જાયા, જોવે તુમહાય હાચ્યાયે ખોબાર, એટલે તારણ દેનારી હારી ખોબાર વોનાયા, તોવે તુમહાય ખ્રિસ્તાવોય બોરહો કોઅયો, એને પોરમેહેરાય પોતે કોઅલા વાયદાનુસાર પવિત્ર આત્મા દેયન, તુમહાવોય ચ્યા હક્કા મોહર લાવી.

14 પવિત્ર આત્માબી ચોક ગેરાંટયે હારકા હેય જી યે વાતેલ સાબિત કોઅહે કા પોરમેહેર આમહાન વારસાય દેઅરી જ્યાલ દેઅના વાયદો ચ્યાય કોઅલો હેય એને જ્યાહાલ ચ્યાય પોતાના લોક ઓઅરાહાટી વેચાતાં લેદલા હેય, એટલે પોરમેહેરા મહિમા એને સ્તુતિ ઓઅે.

આત્મિક ઓકાલે હાટી પ્રાર્થના

15 યા બોદા લીદે જીં પોરમેહેરાય કોઅયાહાં, જોવેને માયે પ્રભુ ઈસુવોય તુમહે બોરહો કોઅના બારામાય, એને પોરમેહેરા બોદા લોકહા પ્રતિ તુમહે પ્રેમ કોઅના બારામાય વોનાયો.

16 તે આંય તુમહેહાટી સાદા પોરમેહેરા ધન્યવાદ કોઅતાહાંવ, એને આંય જોવેબી પ્રાર્થના કોઅતાહાંવ મા પ્રાર્થનામાય તુમહાન યાદ કોઅતાહાંવ.

17 આંય ઈ પ્રાર્થના કોઅતાહાંવ કા મહિમામય પોરમેહેર, આમહે પ્રભુ ઈસુ ખ્રિસ્તા મહિમામય આબહો એને મહિમા આબહો, તુમહાન આત્મિક જ્ઞાન એને બુદ્ધિ દેય, જેથી તુમા આજુ વોદારી પોરમેહેરાલ હારેકોય હોમજી હોકા.

18 આંય પ્રાર્થના કોઅતાહાંવ કા પવિત્ર આત્મા હાચ્યાં હોમજાંહાટી મોદાત કોઅરી, તુમા જાંઆય લેય કા પોરમેહેરાય તુમહાન નિવાડલા આતા તોવે જીં આશા તુમહાન દેનલી આતી, તી આશા એને બોરકાતથી કોલહી મહાન એને મહિમામય હેય, જ્યા વાયદો પોરમેહેરાય આપહે પવિત્ર લોકહાઆરે કોઅલો હેય.

19 આંય વિચારતાહાવ, કા તુમા ચ્યા મહાન એને શક્તિશાળી સામર્થ્યા બારામાય જાંઅયા જો પોરમેહેરાપાય આમહેહાટી હેય, જ્યે ચ્યા ખ્રિસ્તાવોય બોરહો કોઅતેહે.

20 ઈ તી મહાન શક્તિ હેય જ્યે ઉપયોગ પોરમેહેરાય તોવે કોઅયો જોવે ચ્યાય ખ્રિસ્તાલ મોઅલા માઅને પાછો જીવતો કોઅયો, એને જોવે ચ્યાય ખ્રિસ્તાલ હોરગામાય ચ્યા જમણી એછે માનાપાના જાગાવોય બોહાડયો.

21 તો હોરગામાય રાજ્ય કોઅનારાહાવોય એને ઓદિકારહયાવોય, એને બોદા જાત્યા સામર્થ્યાવોય, એને યા દુનિયામાયજ નાંય, બાકી ભવિષ્યામાય યેનારા દુનિયાવોય બી રાજ્ય કોઅરી.

22 પોરમેહેરાય બોદી વસ્તુહુલ ખ્રિસ્તા ઓદિકારા તાબામાંય કોઅય દેના, એને પોરમેહેરાય ખ્રિસ્તાલ બોદી વિસ્વાસી મંડળીહયેવોય પ્રધાન ઠોરવ્યો.

23 વિસ્વાસી લોકહા મંડળી ખ્રિસ્તા શરીર હેય, એને ખ્રિસ્ત શરીરા ટોલપી હેય, એને મંડળી ખ્રિસ્તાકોય બાઆલી હેય, જો બોદે જગ્યા

બોદી વસ્તુહુલ ય્યા હજરીકોય બોઅય દેહે.

2

મોઅલા માઅને જીવી ઉઠના

¹ પેલ્લા તુમહાપાય પોરમેહેરાપાઅને નોવા જીવન નાંય આતા, તુમા ખારાબ કામ એને પાપ કોઅના લીદે મોઅલા લોકહા હારકે આર્તે.

² એને તુમા દુનિયા લોકહા હારકે જીવન જીવતે આર્તે, એટલે સૈતાના આગના પાલન કોઅતે આર્તે, જો આકાશામાય ખારાબ આત્માહાવોય શાસન કોઅહે, એને આમી પોરમેહેરા આગના નાંય માનનારા લોકહાન ય્યા તાબામાંય કોઅરાહાટી કોશિશ કોઅહે.

³ આપાબી ય્યાહા હારકે જીવતે આર્તે, આપહે પાપી સ્વભાવા ઇચ્છા પુરી કોઅતે આર્તે, એને શરીર એને મોના વાસના પુરી કોઅતે આર્તે, એને અવિસ્વાસી લોકહા હારકા આપાબી ખારાબ આર્તે એને પોરમેહેરા ડોડા આધીન આર્તે.

⁴ બાકી પોરમેહેર બોજ દયાળુ હેય, ય્યા પોતાના મોઠા પ્રેમ કોઅના લીદે જ્યાકોય ય્યાય આમહાવોય પ્રેમ કોઅયા.

⁵ જોવે આમા ખારાબ કામ એને પાપ કોઅના લીદે મોઅલા લોકહા હારકે આર્તે, તે પોરમેહેરાય આપહાન ખ્રિસ્તાઆરે જીવતા કોઅયા, પોરમેહેરા સદા મોયા લીદે આપહે તારણ જાયલા હેય.

⁶ પોરમેહેરાય આપહાન ઈસુ ખ્રિસ્તાઆરે મોઅલા માઅને જીવતા કોઅયા, એને આપહાન હોરગામાય ઈસુ ખ્રિસ્તાઆરે રાજ્ય કોઅરાહાટી લાયકે બોનાવ્યાં.

⁷ પોરમેહેરાય ઈસુકોય એહેકેન યાહાટી કોઅયા, કા યેનારા દિહહયામાય તો દુનિયા લોકહાન આખી હોકે કા ય્યા સદા મોયા કોલહી મહાન હેય, જી ય્યાય ખ્રિસ્તામાય આમે બોદહાવોય દેખાડયાહા.

⁸ કાહાકા તુમહે ઈસુ ખ્રિસ્તાવોય બોરહો કોઅના લીદે, પોરમેહેરા સદા મોયા ને લીદે તુમહે તારણ જાયલા હેય, ઈ તુમહે પાયને નાંય જાયા, બાકી પોરમેહેરા દાન હેય.

⁹ એને ઈ તુમહે હારાં કામહા લીદે નાંય, યાહાટી કાદાબી પોતે મોનામાય અભિમાન નાંય કોઅે.

10 પોરમેહેરાય આપહાન બોનાવ્યે, ચ્યાય ઈસુ ખ્રિસ્તામાય આપહાન ચ્યે હારેં કામે કોઅરાહાટી સૃષ્ટિ કોઅયી, જ્યાહાન પેલ્લાનેજ પોરમેહેરાય આપહેહાટી તિયાર કોઅયા.

ખ્રિસ્તામાય બોદે ચોક હેય

11 યાહાટી યાદ કોઆ, કા તુમા જન્માથી ગેર યહૂદી હેય, યહૂદી લોક એટલે, સુન્નતવાળા લોક જ્યાહાય શરીરામાય સુન્નત કોઅલા હેય, તુમહાન સુન્નત વોગાર્યા આખતાહા.

12 પેલ્લા તુમા ખ્રિસ્તાલ નાંચ જાઅતા આતા, એને ઈસરાયેલ, જ્યા પોરમેહેરા નિવડી લેદલા લોકહા હારકા તુમા સામીલ નાંચ કોઅલા ગીઅલા, તુમા પોરમેહેરા લોકહાઆરે કોઅલા વાયદામાય સામીલ નાંચ આતા, તુમહેપાય કાયજ આશા નાંચ આતી, એને દુનિયામાય તુમા પોરમેહેરા વોગર રોતા આતા.

13 તુમા પેલ્લા પોરમેહેરાપાઅને દુઉ આતા, બાકી આમી તુમા ઈસુ ખ્રિસ્તાઆરે ચોકઠા ઓઇન ઈસુ ખ્રિસ્તા લોય વોવાડલાકોય પોરમેહેરા પાહી ઓઅય ગીઅલા હેય.

ખ્રિસ્તામાય ચોક

14 ખ્રિસ્ત આપહે શાંતી હેય, વિતી ગીઅલા સમાયામાય, ઈ એહેકેન આતા જેહેકેન ચોક બીતડાય યહૂદી એને ગેર યહૂદી લોકહાન આલાગ કોઅય દેના, ચ્યે ચોકબીજાઆરે ઘૃણા કોઅતે આર્તે, બાકી આમી ખ્રિસ્તાય ચ્યા બીતડાલ પાડી ટાકલાં હેય, એને યહૂદી એને ગેર યહૂદી લોકહાન ચોક કોઅય દેનલા હેય.

15 એને ખ્રિસ્તા મોરણાકોય, ચ્યાય મૂસા નિયમા બોદા નિયમ એને વિદિહિલ રદ કોઅય દેના, જેથી તો યહૂદી એને ગેર યહૂદી લોકહાવોચમાય શાંતી બોનાડી રાખે, એને એહેકેન ચોક નોવો લોકહા ટોળો તિયાર કોઅય હોકે.

16 હુળીખાંબાવોય ખ્રિસ્તા મોરણાકોય, ખ્રિસ્તાય યહૂદી એને ગેર યહૂદી લોકહાન ચોખઠા કોઅય દેના એને ચ્યાહા પોરમેહેરાઆરે મેળમિલાપ કોઅય દેના, એહેકેન યહૂદી એને ગેર યહૂદી લોકહા વોચમાઅને દુશ્માની મિટાડી દેની.

17 એને ખ્રિસ્તાય ચેયન, તુમા ગેર યહૂદી જ્યે પોરમેહેરાપાઅને દુર આતે, એને યહૂદી લોક જ્યે પોરમેહેરા પાહી આતે, બેનધ્યાન મેળમિલાપા શાંતી હારી ખોબાર આખી.

18 ખ્રિસ્તા લીદે, આપા બોદે ચોકુજ પવિત્ર આત્માકોય પોરમેહેર આબા પાહી ચેય હોકતેહે.

ખ્રિસ્ત આપહે ખૂણા દોગાડ

19 યાહાટી તુમા ગેર યહૂદી આમી પારદેશી એને મુસાફરી નાંચ રિયા, બાકી પવિત્ર લોકહાઆરે સભ્ય બોની ગીઅલા હેય, એને તુમા પોરમેહેરા કુટુંબા બોની ગીઅલા હેય.

20 પ્રેષિત એને ભવિષ્યવક્તાહા પાયાવોય તુમા ચોક ગોઆ હારકા હેય એને જ્યા ખૂણા વોઅને મુખ્ય દોગડો ઈસુ ખ્રિસ્ત હેય.

21 ખ્રિસ્તજ હેય જો પુરાં ગોઆલ ચોકહાતે જોડી રાખના કારણ હેય, તો પોરમેહેરાહાટી ચોક પવિત્ર દેવાળા બોનાહાટી આપે બોદા લોકહાન ચોકહાતે જોડી રિયહી.

22 ઓ ગેર યહૂદી વિસ્વાસ્યાહાય તુમા ખ્રિસ્તાઆરે ચોકજુટ હેય, યાહાટી તુમાબી પોરમેહેરા બિજા લોકહાઆરે જોડાય રીઅલા હેય, જેથી તુમા ચોક ઓહડા ગોઆ બોની જા, જાં પોરમેહેરા આત્મા રોહે.

3

રહસ્ય પ્રગટ જાયા

1 યા લીદે, આંચ પાઉલ ગેર યહૂદી લોકહામાય ઈસુ ખ્રિસ્તા હારી ખોબાર પ્રચાર કોઅના લીદે જેલેમાય કૈદ હેતાંવ.

2 નોક્કીજ તુમા વોનાલે હેય કા પોરમેહેરે માન હારી ખોબાર પ્રચાર કોઅના જવાબદારી આ સદા મોયાકોય દેનલી હેય.

3 પોરમેહેરા ગુપ્ત ઓજના બોજ સમાયા પેલ્લા ગુપ્ત આતી, આમી પોરમેહેરાય માયેવોય તી ગુપ્ત યોજના પ્રગટ કોઅયીહી, આ બારામાય માયે પેલ્લા બી કોલહાક શબ્દ લોખલાં હેય.

4 જેહેકેન તુમા પત્ર વાચહા, તુમહાન ખોબાર પોડી કા આંચ ખ્રિસ્તા બારામાય ઈ ગુપ્ત યોજના ભેદ કોલહા હોમજાડતાહાવ.

5 યે ગુપ્ત યોજના બારામાય પેલ્લી પીડી લોકહાન નાંચ આપલા ગીઅલા આતા, બાકી આમી પવિત્ર આત્માય ચ્યા પવિત્ર પ્રેષિત એને ભવિષ્યવક્તાહાલ ચ્યા સંદેશા ખુલાસો કોઅલો હેય.

6 એને પોરમેહેરા યોજના ઈ હેય, ઈસુ ખ્રિસ્તા હારી ખોબારે લીદે એકતામાય રોઅના લીદે ગેર યહૂદી લોક યહૂદી લોકહા બોરકાતમાય, એને યોક શરીરા ભાગ એટલે ખ્રિસ્તા મંડળી, એને પોરમેહેરાય યહૂદી લોકહાઆરે કોઅલા વાયદાહા ભાગી બોની.

7 પોરમેહેરાય માન ચ્યા પોતાની સદા મોયા એને સામર્થ્યાકોય હારી ખોબાર આખાહાટી ચ્યા સેવક બોનાડયોહો.

રહસ્યા મોતલાબ

8 માયેવોય જ્યા બોદા પોરમેહેરા લોકહા કોઅતો હાનામાય હાનો હેય, માન ગેર યહૂદી લોકહાન ખ્રિસ્તામાય મિળનારી બોરકાત બારામાય હારી ખોબાર આખના સદા મોયા મીળહી. ઈ બોરકાત જી આમહાન ખ્રિસ્તામાય મિળહે, તી માઅહા હોમાજનાથી બારે હેય.

9 એને પોરમેહેરા ગુપ્ત યોજના બારામાય લોકહાન હોમજાડાહાટી મોદાત કોઉ, કા ચ્યે ગુપ્ત યોજના ભેદ કાય હેય, જો બોદહાલ બોનાવનારા પોરમેહેરે દુનિયા બોના શુરવાતથી ઈ ગુપ્ત યોજના ગુપ્ત રાખ્યેલ.

10 એટલે આમી મંડળી કોય, પોરમેહેરા આલાગ-આલાગ પ્રકારા જ્ઞાન ચ્યા પ્રધાન એને ઓદિકાર્યાહા વોય જ્યા હોરગ્યા જાગામાય હેય, પ્રગટ કોઅલા જાય.

11 પોરમેહેરાય ઈ દુનિયા બોનાવા પેલ્લા ઈ યોજના બોનાવી, જી ઈસુ ખ્રિસ્તાકોય પુરી કોઅયી.

12 ઈસુ ખ્રિસ્તાવોય બોરહો કોઅના લીદે, આપહાન પોરમેહેરા હજ્યેમાય યાહાટી ઈમાત એને ઓદિકાર હેય.

13 યાહાટી આંચ તુમહાન વિનાંતી કોઅહુ, કા જીં દુઃખ આંચ બોગવી રિયહો ચ્યા લીદે તુમા નિરાશ મા ઓઅહા, કાહાકા ઈ તુમહે બોદહાહાટી ફાયદા હેય.

એફેસી મંડળીહાટી પ્રાર્થના

14 યા લીદે, આંચ પોરમેહેર આબાલ પ્રાર્થના કોઅતાહાંવ,

15 જો હોરગામાય એને દોરતીવોય બી બોદા વિસ્વાસી પરિવારહા આબહી હેય.

16 પોરમેહેર ચ્યા મહિમા નુસાર તુમહાન ઈ દાન દેય કા ચ્યા પવિત્ર આત્મા તુમહાન ઓહડા સામર્થ્ય દેય કા તુમા પોતે આત્મામાય મજબુત ઓઆ.

17 જેથી ખ્રિસ્તાવોય બોરહો કોઅલા કોય ખ્રિસ્ત તુમહે હૃદયામાય રોય, એને પોરમેહેર તુમહાન ચોક બિજાવોય પ્રેમ કોઅરાહાટી મજબુત એને સ્થિર કોએ.

18 એને પોરમેહેરા બોદા લોકહાઆરે ઈ હોમાજના સામર્થ્ય મેળવા, કા પ્રેમા પોળાય. એને લાંબાઈ, એને ઉચાઈ, એને ઉન્ડાય કોલહી હેય.

19 આંચ પ્રાર્થના કોઅતાહાંવ કા તુમા ખ્રિસ્તા પ્રેમ જાંઆય હોકે જીં આપહે હોમાજના બાઆ હેય, જેથી પોરમેહેરા બોદી ભરપુરીકોય તુમા પરિપૂર્ણ ઓઅય જાં.

20 પોરમેહેરા શક્તિકોય જો આપહામાય કામ કોઅય રિયહો, આપહે માગના એને કલ્પના કોઅના કોઅતા બોજ વોદારી પોરમેહેર કોઅય હોકહે.

21 ખ્રિસ્તા મંડળીમાય એને ઈસુ ખ્રિસ્તામાય, પોરમેહેરા સ્તુતિ પીડીથીપીડી લોગુ યુગાન-યુગ ઓઅતી રોય. આમેન.

4

ખ્રિસ્તા શરીરમાય એકતા

1 યાહાટી આંચ પ્રભુ ઈસુ સેવા કોઅના લીદે જેલેમાય કૈદ હેતાંવ, તુમહાન વિનાંતી કોઅહુ કા, પોરમેહેરાય તુમહાન જ્યે રીતેકોય જીવન જીવાહાટી નિવડી લેદે, એ રીતેકોય જીવન જીવા.

2 તુમા પુરીરીતે દિન, નમ્ર એને ધીરજવાન બોના, પ્રેમાકોય ચોકબીજા બુલો સહન કોઅય લા.

3 કાયામ શાંતીમાય બોની રાંહાટી કોશિશ કોઆ, કાહાકા તુમા પવિત્ર આત્માકોય ચોક કોઅલે ગીઅલે હેય.

4 આપા બોદે વિસ્વાસી ચોકુજ શરીરા અવયવાહા હારકે હેય, એને આપા બોદહાન ચોકુજ આત્મા મિળલા હેય, ચોકુજ આશા હેય જયેહાટી તુમહાન નિવડી લેદલા હેય.

5 ઈસુ ખ્રિસ્ત આપહે બોદહા યોકુજ પ્રભુ હેય, આપા બોદે કેવળ પ્રભુ ઈસુ ખ્રિસ્તાવોય બોરહો કોઅજેહે, આપા બોદહાન યોકુજ બાપતિસ્મા મિળલા હેય,

6 યોકુજ પોરમેહેર હેય, જો બોદહા પ્રભુ હેય, તો બોદહાવોય રાજ્ય કોઅહે, તો આપહે બોદહાકોય કામ કોઅહે, એને તો આપે બોદહામાય રોહે.

આત્મિક વરદાને

7 બાકી ખ્રિસ્તાય આપહામાઅને દરેકાલ આ કામ કોઅરાહાટી આલાગ-આલાગ લાયકાત દેનલી હેય.

8 યાહાટી પવિત્રશાસ્ત્ર ખ્રિસ્તા બારામાય આખહે,
“તો બોદહા ઉચે હોરગામાય ચોડી ગીયો,
એને કૈદયાહાલ લેય ગીયો,
એને આય લોકહાન વરદાને દેને.”

9 તો ઉચે ચોડયો, એટલે ઈ હેય, કા જોવે તો હુળીખાંબાવોય મોઅયો, તે પેલ્લા તો દોરત્યે નિચે મોઅલાહા જાગો અધોલોકમાય બી ગીઅલો આતો.

10 ઈસુ ખ્રિસ્ત જો નિચે ચેનો, તો તોજ માઅહું હેય, જો આકાશા કોઅતાબી ઉચે હોરગામાય ચોડયો, એટલે તો બોદી દુનિયાલ પોતાના ઉપસ્થીત્યે કોય બોઅય દેય.

11 એને ખ્રિસ્તાય કોલહાક પ્રેષિત બોનાહાટી નિવડયા, એને કોલહાક ભવિષ્યવક્તા નિવડયા, એને કોલહાક હારી ખોબાર પ્રચાર કોઅનારા નિવડયા, એને કોલહાક સેવક એને હિકાડનારા નિવડયા.

12 આહા જવાબદારી ઈ હેય કા આ પોરમેહેરા લોકહાન આ કામ કોઅરાહાટી તિયાર કોઅે, એને ખ્રિસ્તા શરીર એટલે ખ્રિસ્તા મંડળીલ મજબુત કોઅે.

13 ઈ તાંવ લોગુ ચાલુ રોય, જાવ લોગુ કા આપા બોરહામાય એને પોરમેહેરા પોહો ઈસુ ખ્રિસ્તા બારામાય જ્ઞાનમાય ચોક નાંચ ઓઅય જાજે, તોવે આપા બોદી વાતહેમાય પરિપક્વ ઓઅય જાહું, જેહેકેન ખ્રિસ્ત બોદી રીતીકોય પરિપક્વ હેય, એને આપા પુરીરીતે આ હારકે ઓઅય જાહું.

14 યાહાટી આમીને આમહાય વાયહાના પાહા હારકે વેવહાર નાંય કોઅરા જોજે, એને આમહાય કોદહીબી છેતારનારા લોકહા જુઠા શિક્ષણમાય નાંય ફસાયા જોજે જી હાચ્ચી લાગહે. જેહેકેન લાફા ઉડીલ આગાડી-પાછાડી ડેકલેહે એને વારો એહે-તેહે ફેરવેહે.

15 બાકી પ્રેમાકોય હાચ્ચાં બોલીન, આપા બોદી વાતહેમાય પરિપક્વ એને ખ્રિસ્તા હારકે બોની જાજે, જો આપહે શરીર એટલે, ખ્રિસ્ત, મંડળી ટોલપી હેય.

16 આપા બોદે જ્યે ખ્રિસ્તાવોય બોરહો કોઅતેહે, ચ્યા શરીરા અવયવા હારકે હેય, જેહેકેન યોક માઅહા શરીર ચ્યા બોદા હાંદહાકોય યોકહાતે જોડાલા રોહે, એને જોવે શરીરા દરેક અવયવ ઠીક રીતે કામ કોઅહે તે શરીર વોદહે એને મજબુત બોનહે. જોવે આપહે માઅને દરેક ચ્યા કામાલ કોઅતેહે જ્યે ખ્રિસ્તાય આપહાન દેનલે હેય, તે આપા મજબુત બોનહું, એને યોક બિજાવોય આજુ વોદારી પ્રેમ કોઅહું.

ખ્રિસ્તમાય નવા જીવન

17 યાહાટી આંય ચ્યા ઓદિકારાકોય જો પ્રભુય માન દેનલો હેય, આંય તુમહાન આખતાહાવ, જેહેકેન અવિસ્વાસી લોક ચ્યાહા મોના વિચારાનુસાર નોકામ્યા જીવન જીવતાહા, તુમા આમી પાછા ચ્યાહા હારકા તેહેકેન જીવન નાંય જીવના.

18 ચ્યાહાન હોમાજના બુદ્ધિ નાંય હેય, એને ચ્યે પોરમેહેરાલ નાંય જાંએત, ચ્યે આગના માનના મોનાય કોઅના લીદે પોરમેહેરા જીવના પાઅને દુઉ હેય.

19 કાહાફા ચ્યે બેશરમ બોનીન ખારાબ કામ કોઅરા લાગી ગીઅલે હેય, કા બોદે ગંદે કામે ચ્યાહા મોના ઇચ્છાકોય કોઅયા કોઅે.

20 બાકી તુમા ઓહડે ખારાબ કામે કોઅના ખ્રિસ્તાપાઅને નાંય હિક્યા.

21 માન ખાત્રી હેય કા જોવે તુમા ઈસુ ખ્રિસ્તા બારામાય વોનાયા, તે તુમહાય ઈસુ ખ્રિસ્તા હાચ્ચાં શિક્ષણ હિક્યા.

22 યાહાટી તુમા પેલ્લા જીવન એને જુનો પાપી સ્વભાવ છોડી દા, કાહાકા તી તુમહાન છેતારનારી ખારાબ વાસનાહા લીદે બોગડાવી રીઅલા હેય.

23 બાકી પવિત્ર આત્માલ તુમહે વિચારાહાલ એને વ્યવહાર નોવા કોઅરા દા.

24 એને પોરમેહેરાય તુમહાન નોવો સ્વભાવ દેનલો હેય, જો પોતાના સ્વભાવા હારકો હેય, યાહાટી યા નોવા સ્વભાવાનુસાર વ્યવહાર કોઆ, આસલીમાય ન્યાયી એને પવિત્ર બોના.

પવિત્ર આત્માલ દુઃખી નાંચ કોઅના

25 યાહાટી છેતારના છોડી દા, એને બોદા વિસ્વાસી લોકહાઆરે હાર્યાં બોલા, કાહાકા આપા ચોકુજ શરીરા અવયવ હેજે.

26 જોવે બિજવાય જાવાય, તે ધ્યાન રાખા કા તુમહેકોય પાપ નાંચ ઓઅય જાય, લાંબા સમાયા લોગુ ગુસ્સામાય મા રાહા.

27 એને તુમહાય સૈતાનાલ દોગો દેઅના મોકો નાંચ દેઅના.

28 ચોરી કોઅનારો પાછો ચોરી નાંચ કોઅે, બાકી ઈમાનદારીકોય કામ ધંદો કોઅે, જેથી બિજા લોકહાનબી જ્યાહાન ગોરાજ હેય મોદાત કોઅય હોકે.

29 કોઅહિબી ખારાબ વાત નાંચ બોલના, બાકી એહેકેન બોલે, જીં સમાયા ઇસાબે બીજહાહાટી હારાં એને ફાયદા રોય.

30 તુમહે જીવન જીવના તરીકાકોય પોરમેહેરા પવિત્ર આત્માલ દુઃખી મા કોઅહા, પોરમેહેરાય પોતે કોઅલા વાયદાનુસાર પવિત્ર આત્મા દેયન, તુમહાવોય ચ્યા હક્કા મોહર લાવી.

31 તુમા રોગ કોઅના, બિજવાય જાઅના, ગાળી દેઅના, નિંદા કોઅના, એને બોદા જાત્યા ખારાબ કામ કોઅના છોડી દા.

32 ચ્યા બોદલે ચોક બિજાવોય કૃપા રાખા એને દયા કોઆ, એને જેહેકેન પોરમેહેરે તુમહાન ખિસ્તામાય તુમહે પાપહા માફી દેની, તેહેકેન તુમાબી ચોકબીજા પાપ માફ કોઆ.

5

પ્રેમમાય ચાલના

1 તુમા પોરમેહેરા પ્રિય પોર્હે હેય, યાહાટી તુમહે વ્યવહાર ચ્યા સ્વભાવાનુસાર રોય.

2 તુમા યોક બિજાવોય પ્રેમ કોઆ જેહેકેન ખ્રિસ્તાય આપહાવોય પ્રેમ કોઅયા, એને સુગંધિત બેટ એને બલિદાના હારકા પોરમેહેરાલ પોતાના જીવનાલ સમર્પિત કોઅયા.

3 કાહાકા તુમા પોરમેહેરા લોક હેતા, યાહાટી તુમહે વોચ્ચે કોઅહા પ્રકારા વ્યબિચાર, એને કોઅહાબી પ્રકારા ખારાબ કામ, કા લોબા વિચાર નાંચ યા જોજે.

4 શરમજનક વાતો, એને નોકામ્યો વાતો, એને હસી મજાક વાતો નાંચ ઓઅરા જોજે, કાહાકા ઈ તુમહાન સોબા નાંચ દેય, બાકી તુમહાન પોરમેહેરા ઘન્યવાદ કોઅરા જોજે.

5 કાહાકા તુમા હારેકોય જાંઅતાહા કા કાદાબી વ્યબિચારી માઅહું, કા ખારાબ માઅહું, કા લોબ કોઅનારા માઅહું જી મુર્તિ પાગે પોડના હારકા હેય, ઓહડા માઅહું કોવેબી ખ્રિસ્તા એને પોરમેહેરા રાજ્યા ભાગીદાર નાંચ બોની.

6 કાદાબી તુમહાન નોકામી વાતહેકોય દોગો નાંચ દેય, કાહાકા યા કામહાહાટી પોરમેહેરા ગુસ્સો આ આગના નાંચ માનનારાહાવોય યેહે.

7 યાહાટી તુમા આહાઆરે પાપી કામે કોઅરાહાટી ભાગી નાંચ બોનના.

ઉજવાડામાય ચાલના

8 તુમા પેલ્લા સૈતાના તાબામાંય આંદારામાય આતા, બાકી આમી તુમા પ્રભુમાંય ઉજવાડામાય હેય, યાહાટી ઉજવાડા પોહહા હારકા જીવન જીવા.

9 કાહાકા જી કાદાં માઅહું પ્રભુમાંય ઉજવાડામાય રોહે, તે આ જીવન હારાં એને ન્યાયી રોહે, એને આવોય બોરહો કોઅલો જાહે.

10 ઈ હોમજાંહાટી કોશિશ કોઆ કા પોરમેહેરા ઇચ્છા કાય હેય.

11 જ્યા લોક ગન્દે કામે આંદારામાય કોઅતાહા, આહાઆરે ભાગીદાર મા બોનહા, બાકી લોકહાન આખા કા યે કામે ખારાબ હેય.

12 કાહાકા અવિસ્વાસી લોકહા ગુપ્તમાય કોઅલા ખારાબ કામહા બારામાય વાત કોઅના બી શરામ યેહે.

13 બાકી જોવે ખારાબ કામ કોઅનારા લોક તુમહે હારે કામે દેખતેહે, તોવે આહા ખારાબ કામે દેખાય જાય, એને ચ્ચે ખારાબ કામે કોઅના છોડી દી, એને તુમહે હારકા હારે બોની જાય.

14 યાહાટી માઅહે એહેકેન આખતેહે, “તું જો હૂવી જાનારો જાગી જો, એને મોઅલા માઅને જીવી ઉઠ, તે ખ્રિસ્તા ઉજવાડો તોવોય ચોમકી.”

બુદ્યે માય ચાલા

15 યાહાટી દિયાન રાખા કા તુમા કેહેકેન જીવન જીવતેહે, ઓક્કલવોગાર્યા લોકહા હારકા નાંય, બાકી ઓક્કલવાળા લોકહા હારકા જીવન જીવા.

16 હારાં કામ કોઅરાહાટી મિળલો મોકો ઓક્કલીકોય વાપર કોઆ, કાહાકા ખારાબ દિહહયા સમય હેય.

17 યાહાટી ઓક્કલવોગાર્યા મા ઓઅતા, બાકી ધ્યાન દેયને હોમજાં કા પોરમેહેર તુમહાન કાય કોઆડાં માગહે.

18 એને દારવા પીન સાકલા નાંય ઓઅતા, કાહાકા સાકિન કાય કોઅતેહે તી હોમાજ નાંય પોડે, એને ચ્યાકોય ખારાબ કામે ઓઅતેહે, બાકી પવિત્ર આત્માલ તુમહાન તાબામાંય કોઅરાહાટી મોકો દા.

19 જોવે તુમા બેગે ઓઅતેહે, તોવે મિળીન ગીતશાસ્ત્ર, એને સ્તુતિ ગીત એને બીજે ગીતે જ્યેં પવિત્ર આત્મા તુમહાન આખાહાટી અગુવાઈ કોઅતા હેય આખા, એને પોત-પોતાના મોનામાય પ્રભુહાટી ગીતે આખા એને સ્તુતિ કોઅતે રા.

20 એને પોરમેહેર જું કાય આપહેહાટી કોઅહે, ચ્યે બોદી વાતહેહાટી સદા આપહે પ્રભુ ઈસુ ખ્રિસ્તા નાવાકોય પોરમેહેર આબા ધન્યવાદ કોઅતે રા.

21 એને ખ્રિસ્તા બિક રાખીન તુમા ચોક બિજા આધીન રા.

માટડાહાન એને થેઅયેહેન ચેતાવણી

22 ઓ થેઅયેહેય, તુમા પોતાના માટડાહા એહેકેન આધીન રા જેહેકેન તુમા પ્રભુ આધીન રોત્યોહો.

23 કાહાકા માટડો થેઅયે ટોલપી હેય જેહેકેન ખ્રિસ્ત મંડળી ટોલપી હેય, ખ્રિસ્ત મંડળી તારણારો હેય, એને મંડળી ચ્યા શરીર હેય.

24 જેહેકેન મંડળી ખ્રિસ્તા આધીન હેય, તેહેકેન થેઅયોબી બોદી વાતહેમાય પોત-પોતાના માટડા આધીન રોય.

25 ઓ માટડાહાંચ, તુમા પોત-પોતાના થેઅયેહેન પ્રેમ કોઆ, જેહેકેન ખ્રિસ્તે ચ્યા મંડળીવોચ પ્રેમ કોઇન ચ્યેહાટી પોતાનો જીવ દેય દેનો.

26 જેથી ચ્યેલ વચન એને બાપતિસ્મા કોય ચોખ્ખી કોઇન પવિત્ર બોનાવે.

27 એને તો ચ્યા મંડળીહાટી મોઅઇ ગીયો, જેથી તો આપહાન પરિપૂર્ણ બોનાવી હોકે, એને આપા બોદહાન ચ્યા હજરીમાય લેય યેય હોકે, જ્યામાય કાયજ દોષ, કા પાપ કા કોઅહીજ ઓહડી ખારાબ વાત નાંચ રોય બાકી પવિત્ર એને નિર્દોષ રોય.

28 ચાજ પરમાણો, માટડો પોત-પોતાના થેઅયેવોચ પોતાના શરીરાવોચ જેહેકેન પ્રેમ કોઅહે તેહેકેન પ્રેમ કોએ, એને જો પોતાની થેઅયેવોચ પ્રેમ કોઅહે, તો પોતાના શરીરાવોચ પ્રેમ કોઅહે.

29 કાહાકા કાદાબી માઅહું પોતાના શરીરાઆરે આડાઇ નાંચ કોએ, બાકી દેખભાલ કોઅહે, જેહેકેન ખ્રિસ્તબી મંડળી દેખભાલ કોઅહે.

30 ચાહાટી આપા બોદે ખ્રિસ્તા શરીરા અવચવાહા હારકે હેય.

31 ચાહાટી જેહેકેન પવિત્રશાસ્ત્રમાય લોખલાં હેય, “માટડો આયહે આબહાલ છોડીન ચ્યા થેઅયેઆરે રોઅરી, એને ચ્યે બેની જાંએ ચોકા શરીરા બોની.”

32 ઓ ચોક મહાન ભેદ હેય, આંચ ચા બરાબરી ઈસુ ખ્રિસ્ત એને ચ્યા મંડળીઆરે કોઅહું.

33 બાકી ઈ તુમહેહાટી બી હેય, તુમા ચોકાયોક માટડા પોત-પોતાની થેઅયેલ પોતાના હારકો પ્રેમ કોઆ, એને થેઅયોબી પોતાના માટડા આદર કોએ.

6

આયહો-આબહો એને પોહું

1 ઓ પાહાહાય, તુમા તુમહે આયહે આબહા આગના માના, કાહાકા ઈજ કોઅના બરાબર હેય.

2 જેહેકેન પવિત્રશાસ્ત્રમાય લોખલાં હેય, “તું તો આયહે આબહા આદર કોઓ, ઈ પેલ્લી આગના હેય, એને વાયદો બી હેય,

3 જેથી તો બોદા હારાં ઓએ એને તું દોરતીવોચ લાંબા જીવન જીવે.”

4 ઓ આબહાય, તુમહે પાહાહાન ખીજવાડાહા મા, બાકી જેહેકેન પ્રભુ શિક્ષણ હેય, તેહેકેન તુમા ચ્યાહાન હિકાડાં એને પાલનપોષણ કોઆ.

ઘોણી એને ચાકાર

5 ઓ ચાકારાહાય, દોરતીવોય જ્યા તુમહે દુનિયાવાળા ઘોણી હેય, સાવધાનીકોય ચ્યાહા આદર એને સન્માન કોઆ, કેવળ દેખાવો મા કોઅહા, તુમહામાય હર ચોકાલ બિઅતા એને કાપતા જેહેકેન ખ્રિસ્તા, આગના માનતાહા તેહેકેન દોણ્યાબી આગના માના જોજે.

6 તુમા માઅહાન ખુશ કોઅરાહાટી દેખાડાં પૂરતાજ નાંચ કામ કોઅતા, બાકી ખ્રિસ્તા સેવાકાહા હારકા સેવા કોઆ, જો ચ્યા પુરાં મોનાકોય તીજ કોઅહે જીં પોરમેહેરા ઇચ્છા હેય કા ચ્યે કોએ.

7 એને તુમા ખુશીકોય તુમહે કામ કોઅતા રા, જેહેકેન માઅહાહાટી નાંચ, બાકી પ્રભુ સેવા કોઅતાહા.

8 કાહાકા તુમહાન ખોબાર હેય, કા જો કાદો જેહેકોય હારેં કામે કોઅરી, જો ચાકાર હેય, યા સ્વતંત્ર તે પ્રભુ પાઅને ચ્યા ઇનામ મેળવી.

9 ચે રીતે ઓ ઘોણાહાય, તુમા ચાકારાહાન દોમકી નાંચ દેઅના, બાકી ચ્યાહાઆરે હારો વ્યવહાર કોઆ, કાહાકા તુમહાન ખોબાર હેય, કા હોરગામાય ચ્યાહા એને તુમહે ચોકુજ ઘોણી હેય, એને તો કાદા પક્ષપાત નાંચ કોએ.

આત્મિક હત્યાર

10 છેલ્લે આત્મિક રીતે પ્રભુ શક્તિશાળી સામર્થ્યકોય મજબુત બોના.

11 જેહેકેન ચોક સીપાડો ચ્યા લોડાય કોઅના બોદે આથ્યાર પોવી લેહે, તેહેકેન તુમાબી બોદા આથ્યારાહા વાપર કોઆ જ્યે પોરમેહેરાય તુમહાન દેનહે, જેથી સૈતાન તુમહાન ફસાવા માગે તે ચ્યા તુમા વિરોદ કોઅય હોકે.

12 કાહાકા આપહે લોડાય દુનિયા માઅહા આરે નાંચ, બાકી આમા પ્રધાના એને ઓદિકાર્યાહા વિરુદ્ધ એને અંધકાર શક્ત્યે આરે એને આત્મિક સંસારા સામર્થ્યા વિરુદ્ધ લોડી રીયહા.

13 યાહાટી પોરમેહેરાપાઅને મિળલે બોદે આથીયાર પોવીલા, જેથી ખારાબ દિહહયા સમયામાય તુમા દુશ્માના હમલા હોમ્મે લોડી હોકા, એને લોડાઈ પુરાં કોઇન સ્થિર રોય હોકા.

14 પોરમેહેરા હાચ્યાઇ તુમહે કંબરા આરે પોટા હારકા બાંદી લા, એને ન્યાયી સ્વભાવાલ ઝીલમ હારકા પોવીલા.

15 પોરમેહેરા શાંતી હારી ખોબાર આખાહાટી ખુશી વાઅણે પોવીન ઉબે ઓઅય જા.

16 એને યા બોદહાઆરે બોરહા ઢાલ દોઇન સ્થિર રા જ્યેકોય તુમા સૈતાના બોદા બોળનારા તીર ઉલવી હોકા.

17 યા આરે તારણા ટોપ પોવીલા, એને આત્મા તલવાર જીં પોરમેહેરા વચન હેય લેય લા.

18 બોદે સમયે એને બોદયે રીતેકોય આપહાન તેહેકેનુજ પ્રાર્થના કોઅરા જોજે જેહેકેન પવિત્ર આત્મા આપહાન અગુવાઈ કોઅહે, એને વિનાંતી કોઅતા રા, એને જાગતા રા, કા બોદા પવિત્ર લોકહાહાટી હેય, એને કાયમ વિનાંતી કોઅતા રા.

19 એને મા હાટીબી પ્રાર્થના કોઆ, જેથી આંય ઇંમાતથી હારી ખોબારે બારામાય ગુપ્ત ભેદ હોમજાડી હોકુ.

20 કાહાકા આંય હારી ખોબારે લીદે કૈદમાય હેતાંવ, યાહાટી પ્રાર્થના કોઆ, જેહેકેન માન બોલા જોજે, તેહેકેન બિકવોગર હારી ખોબારે પ્રચાર કોઅય હોકુ.

છેલ્લી સલામ

21 પ્રભુમાંય આમહે પ્રિય વિસ્વાસી બાહા એને વિશ્વાસયોગ્ય સેવક તુખિકુસ તુમહાન મા કાય દશા હેય એને આંય કેહેકેન રોતહાવ આ બારામાય બોદી વાત આખી દેખાડી.

22 ચ્યાલ માયે તુમહેપાય યાહાટી દોવાડયો, કા તુમા આમહે બોદી દશા જાંઆય હોકે, એને તો તુમહાન પ્રોત્સાહન દેય હોકે.

23 આંય પોરમેહેર આબાલ એને પ્રભુ ઈસુ ખ્રિસ્તાલ પ્રાર્થના કોઅતાહાંવ કા તો તુમા બોદહાન શાંતી દેય, એને બોરહા આરે પ્રેમ બી મીળે.

24 જ્યેં માઅહે પ્રભુ ઈસુ ખ્રિસ્તાલ પ્રેમ કોઅતેહે, ચ્યા બોદહાવોય પોરમેહેરા સદા મોયા ઓઅતી રોય.

गामीत नोवो इरात
Bible in Gamit language of India

copyright © 2022 Beyond Translation

Language: (Gamit)

Contributor: Wycliffe USA

Read and download Bible and several other Christian materials in various formats : www.freebiblesindia.in

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-02

PDF generated using Haiola and XeLaTeX on 2 May 2025 from source files dated 2 May 2025

4883a606-3c54-5975-b41a-ca7f8faf825d